

**MESYUARAT KEDUA PENGGAL KEDUA
DEWAN UNDANGAN NEGERI PULAU PINANG
YANG KELIMA BELAS
22 NOVEMBER 2024**

PERKARA : 5(B)32

**SOALAN LISAN OLEH AHLI KAWASAN PULAU TIKUS
YB JOSHUA WOO SZE ZENG**

32. Berapakah jumlah kes kerosakan bangunan dan kenderaan yang disebabkan oleh pokok tumbang?
- (a) Berapakah kes kecederaan akibat dihempap pokok dari bulan Januari 2023 hingga November 2024?
 - (b) Apakah tindakan Kerajaan Negeri bagi mengurangkan insiden kemalangan yang berkait dengan pokok?

**YB H'NG MOOI LYE
MENJAWAB BAGI PIHAK YAB KETUA MENTERI**

32. Secara keseluruhannya, **jumlah kes kerosakan bangunan dan kenderaan** yang disebabkan oleh **pokok tumbang** di bawah pentadbiran **Majlis Bandaraya Pulau Pinang (MBPP)** pada **tahun 2023** adalah sebanyak **30 kes** yang melibatkan **20 buah kenderaan** dan **sepuluh (10) buah bangunan**, manakala **27 kes** pula dilaporkan pada **tahun 2024** yang melibatkan **22 buah kenderaan** dan **lima (5) buah bangunan**.

Bagi pentadbiran **Majlis Bandaraya Seberang Perai (MBSP)** pula, pada **tahun 2023** terdapat sebanyak **19 kes** akibat kejadian pokok tumbang yang melibatkan **16 buah kenderaan** dan **tiga (3) buah bangunan**, manakala **13 kes** dilaporkan pada **tahun 2024** yang

melibatkan **10 buah kenderaan** dan **tiga (3) buah bangunan**.

- (a) Jumlah **kes kecederaan akibat dihempap pokok** dari **bulan Januari 2023** sehingga **November 2024** di bawah pentadbiran **MBPP** adalah sebanyak **sembilan (9) kes**, manakala **tiada kes** mengenainya dilaporkan di bawah pentadbiran **MBSP**.
- (b) Kerajaan Negeri memandang serius berkaitan isu pokok tumbang, tambahan pula selepas berlakunya kematian pelancong warganegara China baru-baru ini. Justeru itu, Kerajaan Negeri melalui kedua-dua Pihak Berkuasa Tempatan (PBT) telah mengambil langkah yang proaktif dengan menyediakan pelan tindakan bagi mengurangkan insiden kemalangan pokok tersebut berulang. Pelan tindakan yang disediakan bagi kedua-dua PBT adalah berbeza antara satu sama lain disebabkan oleh faktor-faktor kawasan lokaliti yang berbeza. Pelan tindakan yang dirancang dan dilaksanakan adalah seperti berikut:

(i) Majlis Bandaraya Pulau Pinang (MBPP)

- 1) Memperluas kawasan kerja-kerja dengan

pelaksanaan Penilaian Risiko Pokok (*Tree Risk Assessment*) pada tahun 2025;

- 2) Melaksanakan **penilaian tahap ketiga (ke-3)** ke atas pokok-pokok berusia dan matang mengikut **praktis arborikultur** dan penyelenggaraan pokok bagi mengurangkan kes kejadian pokok tumbang di 12 jalan utama yang terdiri daripada Jalan Residensi, Jalan York, Jalan Scotland, Jalan Sultan Ahmad Shah, Jalan Pangkor, Jalan Anson, Masjid Kapitan Keling, Lebuhraya Maktab, Jalan Batu Gantung, Jalan Gottlieb, Jalan Masjid Negeri dan Jalan Midland;
- 3) Menyediakan peruntukan kewangan sebanyak **RM1.1 juta** bagi tujuan melaksanakan kerja-kerja inventori pokok dengan menggunakan teknologi *Smart Tree Inventory System* (LIDAR) dan menganalisis maklumat inventori pokok melalui 4D '*Digital Twin*' bagi seluruh kawasan pentadbiran MBPP; dan

- 4) Menggunakan teknologi satelit untuk mengesan tahap kesihatan pokok-pokok dalam memacu agenda hijau melalui penyediaan peruntukan berjumlah **RM1.0 juta** bagi membuat imbasan kesihatan pokok dengan menggunakan satelit untuk memberi amaran awal tentang kesihatan pokok-pokok terutamanya di kawasan bandar;

(ii) Majlis Bandaraya Seberang Perai (MBSP)

- 1) Melaksanakan kerja-kerja penyelenggaraan pokok di seluruh Seberang Perai sebanyak **21,291 batang pokok** bermula **Januari 2024** sehingga **September 2024**;
- 2) Melaksanakan perolehan perkhidmatan penyelenggaraan pokok ameniti di seluruh Seberang Perai termasuk kawasan lapang dan kawasan perindustrian melalui kontraktor di tujuh (7) buah Parlimen di seluruh Seberang Perai dengan anggaran pokok yang terlibat adalah sebanyak **1,500**

batang pokok;

- 3) Melaksanakan pemantauan dan pemeriksaan pokok ameniti dengan menggunakan borang *Visual Tree Assessment* (VTA) atau borang penilaian awalan pokok ameniti, borang pemeriksaan tumbuhan dan penggunaan teknologi LIDAR di kawasan *hotspot* atau kawasan yang mempunyai pokok yang berisiko di Seberang Perai;
- 4) Melaksanakan gotong-royong bagi kerja-kerja pemangkasan pokok bagi menyelesaikan aduan pokok berisiko/berbahaya di ketiga-tiga daerah di dalam kawasan Seberang Perai; dan
- 5) Melaksanakan kerja-kerja penyelenggaraan pokok di jalan-jalan utama **secara berkala pada setiap hujung minggu bermula pada minggu pertama bulan Oktober 2024.**